



Ein cyf/Our ref: MA - L/HID/0471/18

Lynne Neagle AC  
Cadeirydd  
Y Pwyllgor Plant, Pobl Ifanc ac Addysg  
Cynulliad Cenedlaethol Cymru  
Tŷ Hywel  
Bae Caerdydd  
Caerdydd  
CF99 1NA

[SeneddPPIA@cynulliad.cymru](mailto:SeneddPPIA@cynulliad.cymru)

26 Tachwedd 2018

Annwyl Lynne,

## Y Bil Cyllido Gofal Plant (Cymru) – Memorandwm Esboniadol Diwygiedig

Cytunodd Cynulliad Cenedlaethol Cymru ar Egwyddorion Cyffredinol Bil Cyllido Gofal Plant (Cymru) ar 18 Medi 2018. Cynhaliwyd trafodion Cyfnod 2 ar 18 Hydref.

Yn unol â Rheol Sefydlog 26.27, mae Memorandwm Esboniadol diwygiedig wedi ei lunio, ac fe hoffwn dynnu sylw'r Pwyllgor at y newidiadau hynny a wnaed i'r Memorandwm Esboniadol a'r Nodiadau Esboniadol sy'n dod gyda'r Bil.

Dyma'r prif newidiadau o bwys i'r Memorandwm Esboniadol.

### Adran 3 o'r Memorandwm Esboniadol – Diben y ddeddfwriaeth a'r effaith y bwriedir iddi ei chael

O dan y pennawd "Profi'r cynnig", rwyf wedi amlinellu'r datblygiadau diweddaraf mewn perthynas â gweithredu'r cynnig yn gynnar. Rwyf hefyd wedi egluro'r rhesymau dros symud at fodel darparu gwahanol, ar sail adborth gan randdeiliaid yn ystod y flwyddyn gyntaf.

### Adran 4 o'r Memorandwm Esboniadol - Gwerthuso

Mae'r adran hon wedi ei diweddarau i adlewyrchu'r sesiwn frifio gyfrinachol a gafodd aelodau'r Pwyllgor Plant, Pobl Ifanc ac Addysg ar 24 Hydref ynghylch prif ganfyddiadau gwerthusiad y flwyddyn gyntaf o weithredu. Mae'r newid hwn yn nodi bod disgwyl i adroddiad gwerthuso gael ei gyhoeddi ar 22 Tachwedd 2018, neu o gwmpas hynny.

### Adran 5 o'r Memorandwm Esboniadol - Ymgynghori

Mae paragraff 5.9 wedi ei ddiweddarau er mwyn adlewyrchu bod gwelliannau wedi cael eu cyflwyno yn ystod Cyfnod 2 o'r Bil ar ôl cael adborth gan yr Adran Gwaith a Phensiynau. Mae'r gwelliannau hyn yn ceisio sicrhau bod y darpariaethau yn adran 4 o'r Bil mewn cysylltiad â darparu "gwybodaeth gymhwysol" i Weinidogion Cymru gan drydydd parti yn gyson.

### Crynodeb o'r pwerau i wneud is-ddeddfwriaeth yn narpariaethau Bil Cyllido Gofal Plant (Cymru)

Mae'r tabl wedi ei ddiweddarau i adlewyrchu'r pwerau sydd yn y Bil fel y'i diwygiwyd ar ôl trafodion Cyfnod 2.

### Asesiad Effaith Rheoleiddiol

Mae'r Asesiad Effaith Rheoleiddiol wedi'i ddiweddarau er mwyn cynnwys pumed opsiwn newydd. Mae hyn yn adlewyrchu dull partneriaeth ar gyfer gweithredu'r cynnig yn gynnar, a hwn yw'r opsiwn sylfaenol newydd ("gwneud dim"). Mae awdurdodau lleol yn gweithio mewn partneriaeth - mae un awdurdod yn derbyn ac yn prosesu ceisiadau ar ran eraill ac yn gwneud y taliadau perthnasol. Mae hyn yn wahanol i'r opsiwn sylfaenol a nodwyd yn yr Asesiad Effaith Rheoleiddiol pan gyflwynwyd y Bil ym mis Ebrill 2018. Roedd hwnnw'n adlewyrchu'r sefyllfa lle'r oedd pob awdurdod lleol yn cynnal y broses lawn eu hunain, gan gynnwys asesu ceisiadau a phrosesu taliadau i ddarparwyr gofal plant. Rhagwelir y bydd y dull partneriaeth yn parhau am weddill y cyfnod gweithredu'n gynnar.

Mae adran newydd yn yr Asesiad Effaith Rheoleiddiol, sy'n edrych ar gostau, risgiau a manteision opsiwn pump.

### Asesiadau o Effeithiau Penodol

Mae'r asesiadau effaith mewn perthynas â hawliau dynol, hawliau'r plentyn a'r Gymraeg wedi cael eu hadolygu a byddant yn cael eu cyhoeddi ar wefan Llywodraeth Cymru cyn Cyfnod 3.

### Nodiadau Esboniadol

Mae'r Nodiadau Esboniadol, sy'n dod gyda'r Memorandwm Esboniadol diwygiedig, yn adlewyrchu'r diwygiadau a wnaed i'r Bil yn ystod Cyfnod 2. Mae'r nodiadau wedi eu diwygio mewn ymateb i argymhelliad y Pwyllgor Materion Cyfansoddiadol a Deddfwriaethol, sef bod angen i'r Nodiadau Esboniadol egluro bwriad ac effaith y geiriau "rhoi disgrisiwn i unrhyw berson".

Hefyd, mae amserlen y Bil wedi cael ei diweddarau i adlewyrchu'r amserlen a osodwyd gan y Pwyllgor Busnes.

Rwy'n anfon copi o'r llythyr hwn at Gadeirydd y Pwyllgor Cyllid a Chadeirydd y Pwyllgor Materion Cyfansoddiadol a Deddfwriaethol.

Yn gywir



### **Huw Irranca-Davies AC/AM**

Y Gweinidog Plant, Pobl Hŷn a Gofal Cymdeithasol  
Minister for Children, Older People and Social Care